

Pidgin God's Simple Plan

Da Jesus Book

Cuz everybody do bad kine stuff. Dass why nobody can come awesome by demself, da way God like make um c awesome. Fo Da Rome Peopo 3:23

Dis da deal: wen you do da tings you not suppose to do, den you cut yoaself off from God. But get one noddada deal dat God get fo you. He like give you someting dass plenny good -- da real kine life dat stay to da max foeva. An you get dis wen you stay tight wit Jesus Christ, our Boss. Fo Da Rome Peopo 6:23

God like do plenny fo you guys, cuz dass how he stay. He like hemo you guys from da bad kine stuff you guys stay in, if you guys trus God strait out. No mo notting you guys can do by yoaself. God make lidis fo you guys. Dass jalike one spesho present God get fo you guys. Da tings you do by yoaself, eh, no talk big, cuz no worth notting. Fo Da Efesus Peopo 2:8-9

But da guy dat take money fo tax wen stand up far away. He no even like look up to da sky, but he beat on his chest an say, 'God, I one guy dat wen do bad kine stuff. Give me chance!'" Luke 18:13

God wen get so plenny love an aloha fo da peopo inside da world, dat he wen send me, his one an ony Boy, so dat everybody dat trus me no get cut off from God, but get da real kine life dat stay to da max foeva. You know, God neva send me, his Boy, inside da world fo punish da peopo. He wen send me fo take da peopo outa da bad kine stuff dey doing. John 3:16-17

Wen you guys get chance fo do da bad kine stuff, dass da same ting, jalike wat happen to all da odda peopo. But you know, you guys can trus God fo do wat he say. He no goin let you guys get so plenny presha dat you guys no can handle. Everytime get presha lidat, God goin make um so you guys can get outa dat. He goin make you guys strong fo handle, an no fall down. Numba 1 Fo Da Corint Peopo 10:13

I shua bout dis: No mo notting can make God stop loving us guys. No matta if we stay alive o we mahke, no matta if get angel guys o leada guys in da sky, o if get spirits wit power dat go agains us, no matta wateva stay happen now o goin happen bumbye, no matta get guys wit power up dea inside da sky, o down dea inside da groun, no matta get all kine odda kine tings dat God wen make -- no mo notting dat can hemo us from God, so he no love us no moa! Cuz us guys stay tight wit Jesus Christ, da Spesho Guy God Wen Send, an he our Boss. Fo Da Rome Peopo 8:38-39

Christ wen do everyting fo us get um right wit God. Wit ony da Rules, no can do dat. Now, whoeva go trus Christ, dey da ones dat goin get um right wit God. Fo Da Rome Peopo 10:4

God wen say dis inside da Bible, "I wen hear you at da right time. I wen kokua you, da time I like get you outa da bad kine stuff." Eh, lissen! Now da right time fo God get you outa da bad kine stuff you stay in! Numba 2 Fo Da Corint Peopo 6:2

Wen da peopo hear dat, dea heart come sore, an dey tell Peter an da odda guys Jesus wen send all ova, "Bruddas, wat we goin do?"

Peter tell dem, "Every one a you guys gotta come sorry an stop doing all da bad kine stuff you stay do, an get baptize fo show you Jesus guys. He da Spesho Guy God Wen Send. Den he goin let you guys go, an hemo yoa shame fo all dat bad kine stuff, an he goin give you his Spesho Spirit." Jesus Guys 2:37-38

You guys gotta start fo live da new kine way. God wen make dat new kine life so you guys can come jalike him. Den you guys goin be fo real an be good an spesho fo God, an live da true way. Fo Da Efesus Peopo 4:24

Jalike da Bible wen say, "No mo nobody dat do da right ting everytime. No mo even one guy!" Fo Da Rome Peopo 3:10

So den, from da start befo time, da first man Adam, he da one wen start fo do da bad kine stuff. Az why God neva let um live foeva. An from dat time, all da peopo inside da world make jalike dat man. Cuz dey make lidat, same ting jalike dat man, dey all gotta mahke. Fo Da Rome Peopo 5:12

Wen we neva have power notting, Christ wen mahke fo all us guys dat wen ack jalike God no matta. Dass da time God wen pick. Fo Da Rome Peopo 5:6

But den God wen show how plenny love an aloha he get fo us, cuz same time we was doing bad kine stuff, Christ still yet wen go mahke fo us. Fo Da Rome Peopo 5:8

But how his spirit stay, an da way he stay good an spesho fo God, dass wat show dat he God's Boy. We know dat, cuz God wen use plenny power fo make um come back alive afta he wen mahke. You know, I stay talking bout Jesus Christ. He da Spesho Guy God Wen Send. He stay da Boss fo all us guys. Fo Da Rome Peopo 1:4

We know dat Christ wen come back alive afta he wen mahke, an he no goin mahke again. Cuz no mo notting dat get power fo make him mahke one mo time. Fo Da Rome Peopo 6:9

Dat mean, if you talk strait wit yoa own mout, "Jesus, he my Boss," an you trus deep inside yoa heart dat God wen bring Christ back alive afta he wen mahke, den God goin hemo you from da bad kine stuff you stay doing. Fo Da Rome Peopo 10:9

Cuz da Bible say, "Everybody dat aks da Boss fo help um, he goin take um outa da bad kine stuff dey doing." Fo Da Rome Peopo 10:13

I shua bout dis: No mo notting can make God stop loving us guys. No matta if we stay alive o we mahke, no matta if get angel guys o leada guys in da sky, o if get spirits wit power dat go agains us, no matta wateva stay happen now o goin happen bumbye, no matta get guys wit power up dea inside da sky, o down dea inside da groun, no matta get all kine odda kine tings dat God wen make -- no mo notting dat can hemo us from God, so he no love us no moa! Cuz us guys stay tight wit Jesus Christ, da Spesho Guy God Wen Send, an he our Boss. Fo Da Rome Peopo 8:38-39